

दिनांक 10.03.2024

समय: 18.45 बजे

आकाशवाणी जयपुर-अजमेर
प्रादेशिक समाचार

- प्रदेश मांय 31 हजार 8 सौ 25 मेगावॉट बिजली उत्पादन अर खरीद सारू एक लाख साठ हजार करोड़ रुपया रो व्हयो एमओयू-मुख्यमंत्री भजन लाल शर्मा कह्यो ऊर्जा उत्पादन रे साथे राजस्थान रा विकास ने नुवी गति मिलेला ।
- तीन पैली रा मंत्रियां समेत पच्चीस ऊं बत्ती कांग्रेस नेतावां भारतीय जनता पार्टी री सदस्यता ली ।
- राज्य मांय लोकसभा चुणाव ने ले र तैयारियां तेज- मतदाता सूची मांय आप रो नाम देखण री प्रक्रिया रे तैत सगळा पोलिंग बूथां माथे "आओ बूथ चलें" अभियान व्हयो ।
- प्रदेश मांय घणकरी ठौड़ां तापमान मांय बढवार ऊं सर्दी रा असर मांय कमी ।

000

प्रदेश ने बिजली रा हलकां मांय अगाडी बणावण रा मकसद ऊं आज थर्मल अर अक्षय उर्जा रा उत्पादन री नुवी परियोजनावां सारू राज्य सरकार अर केन्द्र सरकार रा उपक्रमां रे बीचे पांच एमओयू अर एक एक पावर परचेज एग्रीमेंट करी ज्यो है । 31 हजार 8 सौ 25 मेगावाट बूतां रा बिजली उत्पादन अर खरीद सारू एक लाख साठ हजार करोड़ रुपयां रा समझौता पत्र हस्ताक्षर करी ज्यो । इण मांय थर्मल, सौर अर पवन तीनूं तरह री ऊर्जा भेळी है । प्रदेश रा तीनूं डिस्कॉम अर छह केन्द्रीय उपक्रमां रे बीचे एमओयू व्हयो । ई मौके मुख्यमंत्री भजन लाल शर्मा, उपमुख्यमंत्री दिया कुमारी अर बिजली मंत्री हीरा लाल नागर मौजूद रह्या । मुख्यमंत्री कह्यो के ई एमओयू ऊं ऊर्जा उत्पादन रे साथे-साथे राजस्थान रा विकास री दिशा मांय नुवां कीर्तिमान थापित व्हला ।

000

प्रधानमंत्री नरेंद्र मोदी आज उत्तर प्रदेश रा आजमगढ जिला ऊं 34 हजार करोड़ रुपया ऊं बत्ती रकम री विकास परियोजनाओं रो उद्घाटन कर्यो अर नीव धरी । वणा कह्यो के वे भारत ने 2047 ताई विकसित बणावण रा वायदा ने पूरा करण सारू पूरी रफतार साथे काम कर रीया है । श्री मोदी कह्यो कि देश रा नौजवानां ने रूजगार अर शिक्षा मुहैया करावण सारू डबल इंजन री सरकार बरोवर काम कर री है । प्रधानमंत्री कह्यो के विपख रे कारण पूर्वांचल मांय केई दशका ताई जातिवाद अर तुष्टिकरण री राजनीति करी ज्यी, फेरू ई लारला दस सालां मांय ई हलका मांय विकास री राजनीति करी जाय री है ।

000

प्रधानमंत्री नरेन्द्र मोदी आवती 12 मार्च ने 85 हजार करोड़ रुपयां ऊं बत्ती री रेल परियोजनावां, रेल विकास कामां अर जात्री सुविधावां रो लोकार्पण करेला अर नीव धरेला । इण रे साथे ई 10 वंदे भारत रेला समेत दूजी रेल सेवावां ने हरी झण्डी दिखा र सरूआत करेला ।

ई कार्यक्रम मांय राजस्थान मांय 61 वन स्टेशन वन प्रोडक्ट स्टॉल्स 5 गति शक्ति कार्गो टर्मिनल, 19 गुड्स शेड, 22 डेडीकेटेड फ्रेट कॉरिडोर टेशन, 3 दोहरीकरण अर नुवी रेल परियोजनावां अर 2 प्रधानमंत्री भारतीय जनऔषधि केन्द्र अर 74 सोलर टेशनां रो वर्चुअल मार्फत ऊं लोकार्पण कर्यो जावेला । वटे ई काले प्रधानमंत्री वर्चुअल तरीकां ऊं जैपर मांय अमृतसर-जामनगर

इकॉनॉमिक कॉरिडोर सेक्शन री कोई 18 सौ करोड़ रूप्यां री दो राष्ट्रीय राजमार्ग परियोजनावां ने देश ने समर्पित करेला।

000

प्रदेश मांय आज तीन पैली रा मंत्रियां समेत पच्चीस ऊं बत्ती कांग्रेस नेतावां भारतीय जनता पार्टी री सदस्यता ग्रहण करी। प्रदेश भाजपा दफ्तर जयपुर मांय व्ह्या कार्यक्रम मांय पैली री कांग्रेस सरकार मांय मंत्री रीया लालचंद कटारिया, राजेंद्र यादव अर खिलाड़ी लाल बैरवा भाजपा मांय भेळा व्ह्या। इण रे अलावा नागौर रा नेता पैली रा विधायक रिछपाल मिर्धा अर विजयपाल मिर्धा ई भाजपा री सदस्यता ली। वठे ई मेवाड़ हलकां रा नेता रणधीर सिंह भिंडर ई आप रा समर्थनियां रे साथे पाछा भाजपा मांय भेळा व्ह्या है। इण रे साथे ई वणा जनता सेना ने भाजपा मांय मिलावण रो ऐलाण ई कर्यो। ई मौके मुख्यमंत्री भजनलाल शर्मा अर प्रदेशाध्यक्ष सीपी जोशी, केन्द्रीय मंत्री भूपेन्द्र यादव समेत केई नेता मौजूद रह्या। भाजपा री सदस्यता लेवण वाळा मांय खास पच्चीस नेतावां मांय पैली रा विधायक आलोक बेनीवाल, रिजु झुनझुनवाला, रामपाल शर्मा, अनिल व्यास, पैली रा आईएएस ओंकार सिंह चौधरी अर अन्तरराष्ट्रीय बाडीबिल्डर प्रिया सिंह मेघवाल खास है।

000

प्रधानमंत्री नरेन्द्र मोदी काले नुवी दिल्ली मांय सशक्त नारी-विकसित भारत कार्यक्रम मांय हिस्सो लेवेला। ई कार्यक्रम मांय नमो ड्रोन दीदी योजना री लाभार्थी महिलावां कृषि ड्रोन री नुमाईश करेला। ई कार्यक्रम मांय प्रधानमंत्री एक हजार नमो ड्रोन दीदी ने ड्रोन सुपेलो।

नमो ड्रोन दीदी अर लखपति दीदी खासकर ने गांवांई महिलावां ने आर्थिक मजबूत अर वां ने रोकड़ आजादी मुहैया करावण सारू प्रधानमंत्री रा अभियान रो हिस्सा है। ई मौके प्रधानमंत्री वां लखपति दीदी ने सनमानित ई करेला जिण दीनदयाल अन्त्योदय योजना री मदद ऊं कामयाबी हासिल करी है। श्री मोदी स्वयं सहायता समूहां नं बैंक कर्ज रा रूप मांय कोई आठ हजार करोड़ रूप्या री रकम ई बाटेला। ओ कर्ज कम ब्याज रेट माथे दियो जावे।

000

आयकर मेहकमो रोकड़ बरष 2023-24 सारू अग्रिम कर जमा करावण सारू ऑनलाईन अभियान चलावेला। केंद्रीय प्रत्यक्ष कर बोर्ड कह्यो है के आयकर महकमा ने चालू रोकड़ बरष रे दौरान लोगां अर संस्थावां रा कुछ खास रोकड़ लेण देण रा बारा मांय जाणकारी मिली है। इण मांय कहिज्यो है के महकमो वा लोगां अर संस्थावां री पिछाण करी है जिण रो टैक्स भुगतान रोकड़ लेण देण मुजब नी है। आयकर महकमो इण तरह रा लोगां अर संस्थावां ने ई-मेल अर एसएमएस ऊं जाणकारी दे रीयो है। महकमो आने आप री अग्रिम टैक्स देनदारी री ठीक गणना कर ने अर इण साल चुकाया जावण वाळा टैक्स ने 15 मार्च ताई जमा करावण री अरज करेला।

000

प्रदेश मांय लोकसभा चुणाव ने ले र तैयारियां तेज व्हे ग्यी है। ई कडी मांय मतदाता सूची माय आपरो नाम देखण री प्रक्रिया रे तैत आज प्रदेश रा सगळा पोलिंग बूथां माथे “आओ बूथ चलें” अभियान चलायी ज्यो। ई अभियान रे तैत वोट देवण वाळां पोलिंग बूथां माथे आपरो नाम, नम्बर अर पोलिंग बूथा रा बारा मांय जाणकारी ली। सिंज्यां 06 बज्या ताई चाल्या ई अभियान रे दौरान वोटर हेल्पलाइन, ईसीआई-सक्षम, केवाईसी अर सी-विजिल जस्या एप्स अर मतदाता जागरूकता पोस्टर्स दर्शयी ज्या। इण रे साथे ई दिव्यांग वोट देवण वाळा ने पोलिंग बूथ माथे मुहैया सुविधावां अर व्हीलचेयर अर आवण जावण री सुविधां मांय जाणकारी दीरीजी सवाईमाधोपुर अर दौसा जिलां मांय आज आओ बूथ चले अभियान ने लेर मतदातावां मांय उमाव निजर आयो। पोलिंग बूथां माथे बूथे लेवल अहलकार मौजूद रह्या।

ई दौरान वोटर लिस्ट मांय कोई कारण नाम नी होवण वाळा मतदातावां री समस्यावां रो निपटारो करी ज्यो। लोकसभा चुणाव ने देखता दौसा जिला मांय केई ठौड़ां बीएसएफ रा जवानां फ्लैग मार्च कर्यो।

000

लोकसभा अध्यक्ष ओम बिरला अर जल संसाधन मंत्री सुरेश रावत आज बूंदी मांय जल संसाधन मेहकमां रा अहलकारां रे साथे समीक्षा मीटिंग करी। वणा अहलकारां ने काश्तकारां तांई पूरो पाणी पूगावण सारू कार्य योजनां तैयार करण रा निर्देश दिया। ई मौके श्री बिरला कह्यो के आपां रो लगस कोटा अर बूंदी रा सगळां गैर पाणत हलकां ने पाणत हलको बणावणो है। जिण ऊं काश्तकारां री निपज बधे अर वां ने फायदो होवे।

जलसंसाधन मंत्री सुरेश रावत कह्यो के ईआरसीपी ऊं बूंदी जिलां लाखेरी अर इंद्रगढ़ हलकां ने जोड्यो जा रह्यो है, जिण ऊं वटे पिवण रो पाणी अर पाणत सारू पूरो पाणी मुहैया वे सकेला। इण ऊं पैला श्री बिरला बूंदी रा खेल संकुल मांय पांच करोड रूप्यां री लागत ऊं बण्या स्वीमिंग पूल, तारागढ़ अर ऐतिहासिक महत्व री दूजी ठौड़ां माथे अर लाईट लगावण रा कामां रो लोकार्पण कर्यो अर नवल सागर मांय 9 करोड रूप्यां ऊं बत्ती री लागत ऊं बणण वाळां म्यूजिक अर लाइट शो काम री ई नीव धरी। केन्द्रीय विदेश राज्यमंत्री मीनाक्षी लेखी आज झालावाड़ जिला रा दौरा माथे री। ई दौरान वणा भाजपा कार्यकर्तावां अर ओहदा दारां रे साथे मीटिंग करी। वणा झालरापाटन रा नामी सूर्य मिंदर अर गागरौन किलां ने ई देख्या।

000

नागौर जिला रा डेगाना हलकां मांय एक सड़क हादसा मांय चार लोगां री मौत व्हे गयी। बच्छवास गांव रे कने ई हादसा मांय एक बेकाबू कार सड़क रे सारे बस री बाट जो रीया एक पिरवार रा चार लोगां ने टक्कर मार दी। ई हादसा मांय तीन लोगां री मौका माथे मौत व्हे गयी। जद के एक री ईलाज रे दौरान मौत व्ही।

000

प्रदेश मांय घणखरी ठौड़ां तापमान मांय बढवार ऊं सर्दी रो असर कम होवण लाग्यो है। घणखरी ठौड़ां दिन अर रात रा तापमान मांय बढवार देखी जावे। मौसम महकमां मुजब लारला 24 घंटां मांय केई ठौड़ां कमती रो तापमान 10 ऊं 15 डिग्री सेल्सियस रे बीचे बण्योडो है। बत्ती रो तापमान 25 डिग्री सेल्सियस ऊं ऊपर दर्ज करी ज्यो। मौसम केन्द्र जयपुर मुजब आवता 13 मार्च ऊं प्रदेश मांय आथूणी विक्षोभ रे सक्रिय होवण ऊं आथूणी अर उत्तराद हलकां मांय बिरखा होवण री आस है। इण रा असर ऊं जोधपुर अर बीकानेर संभाग मांय कुछ ठौड़ां बादळ छाई ज्या रेहवण अर हल्की बिरखा होवण री आस है।

000

प्रदेश मांय पेट्रोल पम्प संचालकां कानी ऊं न्यारी-न्यारी मांगा ने ले र करी जाय री हड़ताल रो मिल्यो-जुल्यो असर रीयो। राजधानी जयपुर मांय आज घणकरां पेट्रोल पम्प बंद रह्या। वटे ई दौसा जिलां मांय कोई 110 ऊं बत्ती पेट्रोल पम्प बंद रह्या। अजमेर जिला मांय पेट्रोल पम्प संचालक राज्य थर री हड़ताल मांय भेळा नी व्ह्या ई कारण आम दिनां री तरह पेट्रोल पम्पां माथे बिकवाळी व्हे री है। राजस्थान पेट्रोलियम डीलर्स एसोसिएशन रा अध्यक्ष राजेन्द्र सिंह भाटी बतायो के वेट री रेट मांय कमी करण अर डीलर रो कमीशन बधावण समेत केई मांगां ने ले र आ हड़ताल 12 मार्च तांई चालेला।

000

दाऊदी बोहरा मुस्लिम समाज रो रमजान रो मीनो आज ऊं सरू व्हे गयो है। प्रदेशभर मांय ई समुदाय रा लोगां आज आप रो पैलो रोजो राख्यो अर मस्जिदां मांय नमाज अदा करी। झालावाड़

रा झालरापाटन, सुनेल, अकलेरा अर खानपुर रा दाऊदी बोहरा मुस्लिम समाज रा लोगां आज बुरहानी मस्जिद मांय रमज़ान री पैली नमाज़ अता करी ।

000